



Fe'au sese i le fanau

E le fesoasoani nei mea o leipo (labels) i taumafaiga a tamaiti, saunoa le pulea'oga o se tasi a'oga maualuga i Aukilani i Saute.

O Salvatore Gargiulo o le pule a Manurewa High, o se a'oga tesile 2, na saunoa faapea o lenei faaupuga 'tesile maualalo' ua molia ai se fe'au sese i le fanau e faapea, o a'oga nei e le lelei.

E foliga a ta'u le numera maualalo , 1 poo le 2, ona faapea lea e leaga sea a'oga.

Peita'i e sese lea faatusatusaga, e le o faatasi le maualalo o le tamaoaiga o se a'oga ma le aano o ana a'oa'oga. E tele a'oga tesile maualalo e iloga ausiga. E iai foi a'oga tesile maualuluga ae faaleiloga ausiga.

O se fe'au e tatau ona faamalamalama atili i matua ma fanau, saunoa le pule a'oga. E iai matua ua fai a latou filifiliga i luga o numera, e faavae i se taofi taufaasese e pei o lea.

E oo lava foi i tamaiti a'oga mai fafo ua ta'ina ai i sea manatu.

E iai le a'oga a Wanganui High lea ua pa'ū ifo i se tesile lona tulaga. A ua popole le pulea'oga i le ono faaititia ai o ana tamaiti a'oga mai fafo. O latou na o loo maua mai ai se vaega feoloolo o tupe maua a le a'oga.

Na saunoa le minisita o le a tagai toto'a i nei atugaluga.

Faigata o le mataupu sa

Ua toe o se aga ona faailoa mai lea o taiala fou mo le a'oa'oina o le mataupu sā (sex education) i totonu o a'oga a le malo, ae tasi le fe'au na manino mai, e le faigofie ona faia ni faaiuga i lenei lava mataupu.

Na māua i se ripoti e faapea ua te'ena e le malo nisi o fautuaga mo ni suiga o'oo'o. O nei suiga e mana'omia mo se tali malosi atu i le to'atele o fanau teine e totō, ma tuua'iina ai nei polokalame a'oga.

O le fautuaga a se fono faufautua na faatu atu ai se manatu i le tatau ona a'oa'o uiga faaali e iloa ai tu faaaloalo i tulaga faapenei. E faapena foi le agaga o le fautuaga a se komiti filifilia i mataupu tau le ola maloloina. Peitai e foliga o le a leai ni suiga tetele e faia.

Ua tuua'iina a'oa'oga i feusua'iga o le mafuaaga o le faatupula'ia o le totō o fanau teine a o a'oga, ma tula'i mai ai le mau faafitauli mo matua ma aiga.

Faitau i la tatou faasoa i le vaiaso fou i lenei mataupu.



MALO E FA: Ua suipi ai lenei tamai manu o le kiwi, toulu nifo o le leona, motusi vae o le kagalu, a o le toa na tuai lana 'alo maua ai i le faapulou. Ia, aua le faapena alii Thaiday, e le ni mea mo'i o taaloga.

To'atolu fano i le mu o se faamanatu malosi

Na faamaonia i se ripoti lata mai a leoleo le moni o uluai ripoti i le faalavelave i Hamilitone, e to'atolu i latou ua maliliu, ae to'afa o loo togafitia i le falema'i.

Peita'i o loo faia pea sailiiliga a leoleo, e faafetaui igoa, le aofa'i ma molimau mai toega o mea na mu i le afi.

Na maua le vala'au e le tautua o faalavelave faafuase'i i se taimi o le 5 i le vaveao o le Aso Toona'i. E taunuu atu leoleo ma le aufuimu ua pule le afi i le fale atoa.

O ni ripoti i mea na tutupu i le po e lumana'i ai e faamaonia ai sa fai se pati a i latou e nonofo ai faatasi ma ni uo sa auai ane. E le o manino mai pe to'afia. Tasi le mea mautinoa e to'afitu tagata (talavou) sa nonofo ai i lenei fale e 6 potu.

Ua faailoa nei suafa o i latou ua maliliu, o le alii o Jake Hayes, 19 tausaga, o lona ulua'i po lea i le fale. O le pati na fai e faafeiloa'i ai lona avea ma se tasi o le 'aufale.

O Connor Swetman, 17 tausaga ma Toni Maree Johnston, 25 tausaga isi.

O e na laki o le alii o Bayley Reid, 17 tausaga, na ia tata'e se faamalama ma sao ai i fafo. O le taimi lea ua sao i fafo le isi to'atolu.

Na molimau Bayley na ia fafaguina Jake ma Connor. Faapea lava ia ua mulimuli mai i laua i ona tua.



E le o mautinoa le mafuaaga o le mu. O se mea o loo su'esu'eina toto'a e leoleo ae e le o faitau esea se gaoiga fa'aalatua.


E le'i fesoasoani foi le tulaga o le fale, talu ai o se fale tuai tele ua silia i se 100 tausaga lona matua. Na leai se faitauga i ai a le afi.

I se isi faalavelave tauafi i Hamilitone lava na oti ai se tamaititi 3 tausaga le matua ina ua mu se fale o se aiga.

Meamanu le vavave o gaoiga a se tuaoi ma lana fanau na iloina, ma latou tata'eina ai se faamalama ma faasao mai ai se tina ma ni tamaiti se to'alua.

E le'i mafai ona faasaoina le uii, 3 tausaga, o O'rlandau le igoa. O le mafua'aga o le mu o le fana afi (ata). E faatau o se meataalo i ni faleloa.

O se faamanatu malosi i matua, e le ta'alo le fanau i ni mea e mu ma maumau ai le ola.



Faasoa o le Vaiaso:

Aua e te faamasino se a'oga i lona numera

O se tasi o mea e vave lava ona e masani ai i le tuputupu a'e i Kalaiasetete o tagata nei e talitonu i le sao a le a'oga i lou olaga e iloa ai poo ai oe.

Sa ou alu i Linwood High. Ua Linwood College i aso nei.

O Linwood e le o se a'oga e so'ona talanoa i ai pe afai o oe o i lona vasega o e sa ma'elegā i le a'oga.

O le Christ's College o se a'oga ma'elegā. A e fia iloa i le lautele ona ta'u lea o Christchurch Boys High.

O la'u filifiliga (a'oga) na pulea e le nofoaga—e te alu i le a'oga e sili ona e lata i ai. E leai ma so'u manatu a mea e ese mai auā na o le pau lava lona o le mea na ou iloa.

I le faagasologa mai o tausaga e foliga ua tatou suia nei i se faatufugaga e fai sona tino. Ua te'i lava ua sui atoa lenei pisinisi o le filifiliga o se a'oga.

O tesile mea uma, o le ta'uleleia mea uma. E mafai e se a'oga ona fausia pe gausia sau tama.

E le ofi uma ni mea i se a'oga se tasi.

Masalo sa e faitau ai i lenei i le Herald of Aso Gafua. O le sola a le lanu pa'epa'e (white flight) o se mea o loo ola ma gaoioi. E una'ia le sola'aga pa'epa'e i le talitonuga e taua le numera.

Tesile 1 e oona, tesile 10 e faatupuola.

O Linwood o le tesile 2.

Ou te le iloa pe o lona sa iai pe leai, a ua tesile 2 nei.

Pe o le a foi sa iai i auga tausaga 80 e augapiu ma so'u iloa i ai, talu ai e le se mea taua ou te le'i fesili foi.

Peita'i na faitauina ai Linwood, Aranui ma so'ai teisi atu i totonu o Sumner.

O Sumner o ina e nonofo ai le 'aumaumea. E le o a'u o so latou.

E le to'atele nisi o latou e o i Linwood ae iai lava nisi, ma o latou na e o mai i le pasi, e nonofo i fale i auvaemauga e manaia le vaaiga.

O nisi o matou e o i Sumner i le faaiuga o vaiaso e ta'e'ele ai.

Na ou faato'a iloa o Linwood e tesile 2 ina ua safea i faafitauli ma avea ma talamua i Kalaiasetete.

Lenei e foliga o se tasi o a'oga ua tauau e malepe.

E foliga o se taufaloga i le va o faia'oga ma le pulega, le pulega ma le komiti faafoe.

Ua aafia ai ma le matagaluga lea ua lafo le upu, ma'ale'ale.

Ou te le iloa le mea e sau ma le mea e alu, ou te le popole i ai.

O le mea taua ia a'u o le a'oga na ou iloina, sa ou a'oga ai, ma fiafia pe ā i ai, ua tulaga pagatia, ma ina ua ou asia ua le o toe iai.



Na ou iloa foi ua alu i lalo le lola mai le taimi sa ou iai, ou te le iloa pe o le sola a le lanu pa'epa'e poo le mafui'e poo sina vaega o na mea e lua.

Ae tasi le mea na ou iloa o Linwood o se tasi o gaoioiga lapo'a i le taulaga, lenei ua le toe faapena.

E tusa i tesile, sa ou manatu o le tesile 2 ua lelei lea mo a'u.

Faamata e sili atu se a'oa'oga o a'u i se a'oga aupito lelei ofoina e le taulaga? Ailoga.

Pe na faalavelaveina ai lo'u taumafai i lo'u alu i se a'oga tesile 2? E le faapena so'u manatu.

Peita'i o le tala ia Linwood o loo aliali mai ai le mea aupito taua i se a'oga, o le ta'ita'iga. E mafai e se pulea'oga ona fausia pe gausia se a'oga.

O le pule na te faia faaiuga e taua, i le faafaigalugaina, le faatonutonuina, le faasoaga o tupe, ma lona tiute i totonu o se faiganuu a'oga.

I lo'u tulaga o se matua ua ou vaai i ni pule ofoofogia, ua ou vaai foi i ni isi masani e le ese mai.

Ua ou vaai i se a'oga e sui i lalo o ni pule e eseese.

E mafai ona tupu i se taimi puupuu lava pe na o se tausaga.

Ma o le mafuaaga lea o lo'u finau mo ni mea se lua.

Totogi o faia'oga e fua i le galuega.

Filifiliga mo matua.

A telē le fetu'utu'una'i i se a'oga o le telē foi lona o le avanoa na te faatonu ai lona alavaa poo le a lava le tesile.

Faatulaga ia sa'o le tulaga ta'uleleia ona o mai lava lea poo le a le mamao. Ae afai e leai, e au ina e totogia se tau telē e mafai ai ona e taulata i ai. Fesili ia Auckland Grammar.

E fesoota'i atu ai i le isi mataupu—sone.

Ioe, e tatau ona e avanoa e ulufale i lau a'oga i talaane, ae faapefea pe afai o lau a'oga i talaane e lavea i se nofoaga e taugata i le nofo?

O le mea tonu lea e fetai ai le totogi e fua i le galuega e fai, e uigā ai le fuafuaga a le malo mo faia'oga ma pule e avea ma taiala (lead personnels).

Aumai taleni iloga ma faasoa atu.

E le faasavala taleni. O nā e sili e tau le maua, ae e le lava tupe e totogi ai.

O se faia'oga sili na te suiga olaga, a o le leaga e ave esea sou naunauga i le a'oga i le olaga atoa.

E moni, o loo finau mai iuni e faapea a sasa'a atu tupe e tele i tagata uma, o le a le pine ona tutusa pau uma, tutusa faia'oga uma, ma faapea foi ona avatu a tatou fanau i soo se a'oga tatou te manana'o ai, auā o le a tula'i mai se lalolagi ofoofogia e fai mai ai lava latou.

Ae pau lona, e le faapena le mea moni.

Auā foi o se miti faivavale.

E fai foi le pitolaau a matua. E to'atele tatou ua tosoa'iina i se ata faigofie o a'oa'oga.

E to'atele tatou ua pulea i lalo o le malosi (faatosina) o le taofi na o sina femilosa'iga e fai e tali ai mana'oga taito'atasi o e pele ia i tatou.

E to'atele tatou o le a naunau tele e taga'i i le faatulagaga o tesile i lenei vaiaso, ae faapea foi CV o fale o loo tatou nonofo ai.

E i'u ina pasae le upega tafailagi.

O le itu malie, o le to'atele o tatou e vave le popole e tusa ia tatou filifiliga taua'oga, o tatou lava ia e o atu i a'oga lata ane, ma faasaosao manuia ai, faafetai tele lava.

Tatou te manana'o uma lava i le mea sili mo a tatou fanau, e le taulia poo a tulaga e feagai ai.

Peita'i o le mea na ou iloa ma vaaia i Linwood o lenei, e laitiiti lava se mea tau i le aano (o ausiga), pe a faitauina soo se mea, e faatatau i le nofoaga e aga'i mai ai le fanau, ae o mea uma lava e faasino i tagata o loo faatautaia le a'oga.

O tagata sili latou te faia faaiuga sili ma faagaoioi ni a'oga sili.

E leai se numera lafotusi o le faimeasili.

E mafai foi e se ta'ita'i sili ona pulea soo se tesile i soo se taimi.

Mike Hosking o se tusitala ma se alii faasalalau lausilafia a Niu Sila. Sa tapa lana faatagaga mo le liliuina o lana tusitusiga mo la tatou faasoa faapitoo o lenei vaiaso.

“mafauauga o le vaiaso”

A sui le auala e te tilotilo ai i ni mea ona sui foi lea o mea e te tilotilo i ai—*Wayne Dyer, tusitala*

Ripoti o le Vaiaso:

Leiloloa faia'oga i le va o a'oga—e tele mafua'aga

Sa faapea na o tamaiti a'oga e faia lea mea o le fegasoloa'i mai lea a'oga i lea a'oga, a ua matauina foi le faatetele o sea tulaga i susuga i faia'oga i lenei vaitau o le taimi.

E le faigata ona iloa lenei tulaga i faaaliga o avanoa faigaluega i luga o le Education Gazette, le Seek ma isi auala faasalalau galuega.

E le o se popolega fou ae o se mataupu na lagalagā ai le aai o finagalo i se tasi a'oga i Aukilani i Saute i nai tausaga na se'i tuana'i. I lenei a'oga tulagalua, e 55 ni faia'oga na leiloloa i totonu o se fa tausaga. I nisi vasega na sui faafā faia'oga i se tausaga se tasi.

O le a'oga a Rowandale i Aukilani i Saute na laasia sea suiga. E 22 potua'oga ae 17 faia'oga na o ese mai i le tausaga talu ai. E 58 le aofa'i na tuua le a'oga i le va o le 2010 e aulia le faaiuga o le 2013.

E tele ni ripoti mai matua e a'o'oga ai o latou alo e faitioina ai le pulega tuai sa iai. E manatu nisi matua o le mafua'aga lea o le o ese o faia'oga.

O le tasi matua na ia ta'utino mai lava le suafa o se pule a'oga sa galue muamua ai.

O le le fiafia o matua na mafua ai ona ave sa latou tusi i le Matagaluega e faia sa latou fono, e faailoa lo latou le fiafia i lenei tulaga o le o ese o faiaoga. O lo latou atugaluga muamua lea.

Fai mai se tasi matua, e tai tofu lava se kuata ma se faia'oga e alu ese mai.

“E le o se mea lelei lea mea mo tamaiti,” faapea mai lea tina.

O le tasi faia'oga tuai na faapea mai 'e foliga ua masani nai tamaiti ma lea mea o le faamavae atu i se faia'oga.

O lona leaga, o le motusia ai o mafutaga e faavae ai ni a'oga lelei, ma toe tau amata foi pe a sau se isi faia'oga.

Na asia le a'oga e se sui o le matagaluega ma na te'ena e le pule ma ni sui o le komiti faafoe le mau a matua a mea o iai ni mea faaletonu i le lotoifale o le a'oga.

O le fatu lea o le su'esu'ega a le ERO ina ua latou asia le a'oga i le faaiuga o le Kuata



Rowandale: *Le alii pule'aoga tuai o Judd McLaughlan pito i luga. Ata i le taumatau: Le alii pule'aoga ua iai nei, Karl Vasau, ma nisi o le fanau a'oga.*



lona tolu o le 2013. E oo mai ia Ianuari o le 2014 ua toaiva ni isi faia'oga ua faamavae.

Ia Tesema 2013 na faaaliga ai e le pule sa iai, Judd McLaughlan, o ia ua maua lona avanoa fou i se a'oga i Hamilton. Na amata ai i le faaiuga o le kuata muamua o le tausaga lenei.

Ua sui nei le pulega o Rowandale ina ua tofia le alii Samoa-Niue o Karl Vasau na te faatautaia le galuega.

Lata mai nei na faasalalau ai nisi ana avanoa taule pulega, ma e foliga mai ua iai sina mapu i le toesea o faia'oga.

Mo se lelei o le pule'aoga tuai, Judd McLaughlan, na pasia e le ERO ana auala na toefuata'i ai le a'oga.

Na ia ta'ua foi le vao mafuaaga e o ese ai faia'oga mai se a'oga.

Ae na ta'ua e se tasi faia'oga tuai e faapea o le tasi mafuaaga, o le le fiafia o nisi faia'oga i le pule ona o le faatonu (a'oa'i) o latou i luma o tamaiti ma isi faia'oga.

I isi foi a'oga e sui le pule ma sui ai foi ma filifiliga a faia'oga sa galulue i lalo o lana ta'ita'iga.

A lē o uiga faaali o le pulega e mafua ai ona o ese faia'oga, o faaiuga fai i totonu o lotoifale taitasi. O nisi faaiuga e fai mo le manuia o le fanau ma le a'oga ae le fiafia ai nisi o le aufaigaluega.

Poo ni faaiuga le tonu foi, e mafua ai ona o ese nisi. O nei uma e aafia tonu ai ausiga a fanau pe afai o ni faia'oga lelei e aafia ai.

O isi mafuaaga o le tuua o se a'oga e fesoota'i tonu i le ola maloloina o faia'oga. E pei o se tasi pulelua (taofia le suafa) i se a'oga i Aukilani i Saute, na o se tolu kuata na galue ai i se a'oga ae faamavae. O lana tala, e taua ia te ia lona ola maloloina. O se tasi lea o a'oga faigata (ulavavale ma faalogogatata tamaiti) sa galue ai.

Peita'i o le to'atele lava e mafua le fegasoloa'i ona o le tulaga o totogi ma tau e maua.

Mo faia'oga talavou e telē le avanoa e tuua ai se galuega i Niu Sila nei pe a ofo mai se galuega totogi lelei i Ausetalia poo Peretania foi.

I nei vaitau o le siita'i o tau o fale ma le soifuuga ua mafua ai ona gasolo atu le to'atele i fafo. E leai se isi e fia nofonofo i se totogi maulalo ae o loo alu i lugā tau o mea, faapea mai se tamaitai faia'oga.

Mo tatou, o soo se fegasoloa'iga o faia'oga ma pule'aoga Pasefika e lelei mo a tatou tamaiti tatou te patipatia lea. Aemaise o le aga'i atu i nofoaga e pei o Aukilani i saute o loo alaala ai le to'atele o aiga Samoa ma uso a Pasefika.

Faavae mai i le ripoti a Nicholas Jones o le NZ Herald ma ni talanoaga ma matua ma faia'oga

O ni auala e mafai ai ona taofi faia'oga i se a'oga

1. Fai lelei totogi o faia'oga. E tatau ona amata uma i le \$47,000 i le tausaga;

2. Fai lelei totogi o pule'aoga ma lagolago. E tatau ona amata uma i le \$90,000 mo a'oga e 500 le aofa'i o tamaiti. \$10,000 i luga a'e mo le isi 100 faapoopo. Lagolago e amata i le \$75,000 ma alauni faapoopo;

3. Fai lelei alauni o faia'oga sinia ma ta'ita'i o 'au. Ta'i \$5,000 i le tausaga. Faia'oga e ta'ita'ia taaloga. Ta'i \$6,000 i le tausaga;

4. Palota uma matua ma faia'oga i le sailiga o tulaga o pule ma lagolago. Ae le na o sui o le komiti faafoe;

5. Ia malamalama ma mafolafola faaiuga uma e fai a le pulega, aua le salua ni mea i lalo o le kapeta e tuu ai;

6. Ia tasi lelei faia'oga. E leai ni o latou taimi e fai ai ni malu taeao auā e usupo e tatala potua'oga. E tatau i a'oga ona sauni morning tea i aso uma ma tova i ni umu lu'au;

Ave foi faia'oga e faatafafao i Disneyland ma mea faapena; fai i tamaiti e saosao e totogi pasese;

7. Ave ese uma tamaiti ulavavale mai vasega. O latou na o faatupuma'i i faia'oga. Fai sa latou lava a'oga i se tulimanu e pei se playgroup. Ma ave i ai ni polo ta'alo se tele;

8. Ave ni iunite tai tolu ma faia'oga e vaaia le 'au ulavavale; ma toe faapoopo ni o latou aso ma'i.

Faavae i le iloiloga faale taualoa a Pole ma Papa

E le iloa ala o vae



O le toe vaega lenei o la'u tala i na aso a o avea ma se tama a'oga nofotumau i se a'oga i Samoa. Ua ou naunau e faasoa atu auā o se tasi vaega taua na fausia lo'u tagata matua. E talitonu o so'u sao lea i le fetufa'iga o lagona e tusa i lenei mataupu.

Na faifai tetele le ma mataupu ma le alii lea sa ou ta'ua. E tuaoi o matou nuu, ae mua i le fia tama leaga.

Ua amata ona faatetele le leaga o le ula lea ia matou taaloga. A fai foi ni galuega tate te'i lava ua tau se 'ulu moto poo se koko i lota papatua. Pe fai foi ni tala faatiga e feoa'i ai mea ma'ai. Ae na ou onosa'i pea. E faigata tele le va lea. E tu mai lava i o'u luma le ata o lo'u tamā ma lana fautuaga.

Peita'i ua oo mai lo'u le toe fia a'oga. Na vave ona iloa e si a'u faia'oga le suiga. O le taimi muamua lea ua faaletonu ai a'u meaa'oga, ma faapea loa ona talanoa mai ia te a'u. Ona ou ta'uina lea i ai o le mea o loo tupu. O lana fautuaga, onosa'i, toe itiiti lava maua lou mapu. Ua le o toe umi ae uma le tausaga.

Ma e sa'o lava le upu, e maua le mea lelei e le onosa'i. E maua malo i le alu i lalo. Na alu ese le alii lea ma aga'i atu i le Matata eseese i Vaivase. A ua avea nei a'u ma se faaiuso. E le ese ma le faiga o se matai, auā sa tofia foi a'u o se ta'ita'i o le a'oga.

I lea lava tausaga na amata ai se a'oga faale Tusi Paia a se tasi alii faia'oga i totonu o le a'oga. O a'u le isi ta'ita'i na vave ona tosina i lea mafutaga. E ese foi le faalogo ma le lagona tupu a'e. Ma e le'i leva ae avea a'u ma se ta'ita'i faamoemoeina i lea foi taumafaiga. Na auai mai foi se vaega feoloolo o la matou vasega faaiuso.

Na avea nei i matou ma ni faata'ita'i lelei i le amio ma le tautala. Ua matou taumafai e lepeti le tu faafaaiuso i ona itu faaletonu, ae faaoga le malamalama fou o a'oga a le Alii e faufau ai ni isi sootaga fou i le va o tausaga poo e laiti ma e matutua.

Ae e le i faigofie mo nisi o la matou vasega. E le tio se isi o le mea ua leva ona ola mai ai, e le faigofie foi ona toe lolo'u se laau ua mago. Ui i lea, na ou iloa se suiga tele i lo matou tausaga. O le taimi muamua foi lea na faafetai ai le pule a'oga ona o le leai o se mea e gase. Na sao lelei lo matou tausaga e leai se faalavelave tuga na tula'i mai i le va nonofo ai o vasega.

Na uma la'u a'oga ona ou alu loa lea ua ou faigaluega. E lua tausaga na ou galue ai i se matagaluega a le malo i Apia.

Ona mana'o loa lea o lo'u tamā ou te su'e i le su'ega mo le a'oga faafaifeau.

Na ou su'e ma na manuia le su'ega. O a'u le tasi o le soloaiga e talavou ma na ou ulufale loa i le a'oga faafaifeau.

O tala o Alo tala o lea foi a'oga nofotumau. Ua leva ona ta faalogo i tala salatua. Na o a'oa'o lava e talanoa taumumusu ai pe a tuua mai ia latou tuuaga. Sa iai nai o'u tei e to'alua (tausoga) e lagolago le tasi ae faaiuso le isi. O la'ua o sifi (matai) o nei tausaga ma na ou malu lelei i lalo o la apa'au mafalā. Se mea ina a lelei o le iai o ni aiga i se mea e te alu i ai.

Ae ou te le'i faaogaina sese lea manuia sa lilo. Sa ou gaiou lava faapei o se tama fou, o le mea foi lea na alofagia ai a'u e isi faaiuso.

Ae e le fou la'u vaai i faiga faafaaiuso i lea foi lotoa Kerisiano. E pei lava o le mea sa ou sau ai i la'u aoga tuai. Mau ē fai fuafua, ae feoloolo foi le 'au faatautala, ma le 'aufia tama leaga.

O le mea e malie ai i la'u matau, o le 'au vaivai lava i le a'oga e solomua le fia tama leaga. E peisea'i e faalava le vaivai i le fia sifi ma le fia sili.

Ae o le a faapuupu la'u tala. I le tausaga na sosoo ai na ou te'i ai i le faapea mai o lo'u tausoga a'oa'o, "E te iloa lau tama foi lea. O lea e au mai i le su'ega."

Na toe foi lo'u mafaufau i tua i le ma fesaga'iga faigata ma le alii lenei i le a'oga sa ma a'oga ai. La ma fetauiga i le maea ma ana faiga faalealofa na fai ia te a'u.

Na a'e mai a ua maka lelei e lo'u tausoga lea ua faaiuso. O lona aso muamua lava i le galuega a le nuu na togi ai e le tagata i le 'ulu. E foi mai le galuega ua leai ni ie'afu fou, leai ni 'aluga fou, o lavalava uma sa i totonu o le 'ato ua savavali.

E le'i uma le kuata a ua ta'u le toe fia foi i lona aiga. (Ua ou toe manatua le taimi na ou musu ai ma le a'oga ona o le uso lea). Ae le na o lo'u tausoga e faafiufiina, e faapena foi isi faaiuso. E mafua ona o uiga lava ia sa inosia ai i la matou a'oga tuai.

Ae na avea faiga na fai i ai ma auala na sui ai. Ua aliali mai nei lona uiga faimeia malie. E uma ane le fa tausaga i le a'oga ua avea ma se tagata faitala malie ma alofagia.

Ua uma lena ona faatoese mai ia te a'u i ana mea sa fai. Na fai i ai lo'u tausoga e sau e faatoese mai. Ua pei nei o sa'u uo latalata ae le o so'u fili uluā. Sa faapea la'u tatalo, "Faafetai le Alii i au faiga e ese lava."



ATA MALUAPAPA A DR VANYA TAULE'ALO



Maluapapa. O le ata na tusia e se tasi o faamatua i le faiva o tusiga ata ma mamanu faaSamoa, Dr Vanya Taule'alo. E te maua i totonu o le Faleata a le *The Vanya Taule'alo Gallery* i lana upega tafailagi. Asiasi i ai pe a e fia malamalama i lona uiga. Pe fia faatau foi sau kopi e teu ai lou ofisa poo lau a'oga.

O SE SOLO I LE SU'EGA

Su'ega

Ua pei oe o se aitu taufaafefe
Lota fatu ua tata vale toe ina a
malepe

Pau le mea na maua o le
susū o lima ma le afu malulu
Tatalo faasefulu 'ai o 'ata mai
lesu

Aumai le tali na o mea faafaga
Ta mā e, 'a nei foi e toe uli le
vaa.

Genesis Talo

E moni lava upu a le atunuu, E au i le tauola au foi i le fagota. A e iloa a'u i Siulepa ou te iloa foi oe i Togamau, e le iloa ala o vae, o a'u nei a o oe taeao.

I le matou tausaga faaiuso na molimau ai le a'oga i ni suiga lelei i faiga i totonu o le lotoa. Ua tele tausaga o o'u galue i le galuega, ae ou te faalogo e talanoa pea le a'oga i lo matou taimi. O se tala faagae'e loto lea, se mea ina a lelei o le ta'uleleia. Ae fai mai foi le upu, e manatua pule ae le manatua faalaeo.

E lata mai se ma talanoaga ma la'u 'uo' pele a o soifua. Sa galue foi mo ni tausaga i le tovine o le Alii. Na fai mai ia te a'u o lona atalii o loo faaiuso i le ma a'oga tuai.

E viia e faia'oga ma tama a'oga ona o le tausolomua i mea e faaleleia ai le va nonofo o le aumatutua ma le aulaiti.

E moni le upu. A e toto le fatu leaga e lē fua mai i se laau lelei ae na o le leaga. A e toto le fatu lelei, e fua mai ai le laau lelei. Manuia le aufaitau. FLA.

Sponsored by Evaleon Books

LOU TALA FA'ASOLOPITO

SAMOA HISTORY

"Ne'i meaane ua galo"



16—22 Novema

- 16
1933 Osofa'i e leoleo le fale o Taisi Nelesoni i Tuaeufu
- 17
1984 Goto le MV Misimoa i le uafu i Pago Pago
- 18
2003 Asia Apia e Dame Cartright Kovana Sili Niu Sila
- 1974 Tanumia se aiga i Solosolo i se solo (eleele) 7 maliliu
- 1946 Tetele le Fono Samoa atoa i le maliega e tausia e malo afaatasi, valaau mo le tutoatasi
- 1944 Taunuu Misi Alatise o le Metotisi, i Samoa
- 1918 Ripoti nusipepa: Faataotolia Apia atoa i le faama'i
- 1880 Alaga le tupu o Malietoa Laupepa

- 19
1883 Toe talosaga Laupepa ia Vitoria o Egelani mo lana pule faamalumalu
- 20
2010 Malo Egelani i le Manu Samoa
- 1918 Teena e Lokeni ofo a Tutuila e fesoasoani i Togafitiga o le Faama'i
- 1839 Eromaga. Fasiotia Ioane Viliamu ma Alisi e tagata Eromaga
- 21
1972 Aso fanau o David Tua
- 1918 Maliu Ah Sue, uluai pule Samoa falelomitusi i Apia, faatonu nusipepa
- 22
1858 Faalava'au se alii Palauli i luga o le manua HMS Cordelia, oti ai le faioloa Egelani o William Fox. Laulau a faamasino—o Samoa uma

*James Ah Sue,
uluai faatonu
Samoa galuega
faanusipepa ma
lomitusi*



O le tala i le galuega lomitusi i Samoa o lena ua fatu ai ni tusi ma ni su'esu'ega. E iai le su'esu'ega aupito lata mai a Spennemann i le mataupu, mo e fia sailiili atili. Na amata le tala i misionare LMS na latou faafeiloa'i mai lena tekonoosi fou i tagata Samoa. E pei ona iloa ai le suafa o le misionare o Sitea sa pulea le uluai falelomitusi lotu i Falelatai. O se tasi lea meaalofo a misionare Peretania ia Samoa ma lana gagana faitau. Auā i le lolomiina o tusi, aofia ai le Tusi Paia Samoa, na mafua ai ona faatele'a'i le galuega a'oa'o a faia'oga i ia taimi, ma popoto uma ai Samoa e faitau tusi. I taimi foi ia ua iai le Samoa Times ma isi puletini Peretania.

Ona sosoo mai lea ma Siamani. O le alii lomitusi Siamani o Emil Lubke, sa pulea le falelomitusi tuto'atasi i Apia o le igoa Samoanische Zeitung. Sa lomina i gagana e lua, le faa-Siamani ma le gagana Peretania.

O le ofi atu o ni Samoa i totonu o pulega o nei galuega sa le'i faigofie. O le alii o James Ah Sue o se tasi o uluai Samoa—pe a le o le uluai Samoa— na tofia e pulea se falelomitusi ma faatonu se galuega nusipepa i totonu o Apia. O lona tamā o se alii Saina; sa a'oga i le a'oga a felela Malisi i Mulivai. Na amata ona faigaluega i le kamupani a le Samoa Times o se fairipoti. Sosoo ai ma se avanoa faigaluega i le Fiji Times i Suva. Na toe foi atu Ah Sue i Apia ma tofia loa o le faatonu sili o le nusipepa Samoanische Zeitung.

E le'i pine ae to'ai taunuu le fitafita a Niu Sila ma faapea ona faalavelaveina ai mea uma tau le igoa Siamani. Na suia le Siamani i le Igilisi i lalo o le igoa Samoa Times, lea na avea ai ma pule (sole owner) ma avea foi ma ona faatonu (editor), seia maliu faafuasei ia Novema 1918. O le mafuaaga o lona maliu, o le fulū Sepania lea na lofia Samoa i lea vaiata o le taimi.

NIUPAC PUBLICATION

Email: evaleon@extra.co.nz
Phone: (09) 269-6186
Postal: PO Box 43122
Mangere Town Centre,
AUK 2153

All rights reserved. This bulletin and its content is protected by copyright laws of New Zealand and international conventions. Except for educational purposes, any other activity pertaining to its use is prohibited. NIUPAC 2014

Editors:

Levi Tavita
ltavita8@gmail.com

Muliagatele Vāvāo Fetui
v.fetui@auckland.ac.nz

Saili Aukuso
saili.puletini.aoga.ola@gmail.com

Sponsors:

New Zealand Lottery Commission

Evaleon Books & Niupac Publishing

Whealers Books (NZ)








EVALEON BOOKS & NIUPAC PUBLISHING



Telefoni (09) 269-6186. Imeli: evaleon@extra.co.nz

Tautua e ala i le gaosia o alaga'oa mo a'oga (tusi mo le a'oa'oina o le faitau i le gagana Samoa, tusi e a'oa'o ai gagana, kalena, posters, yearbooks, brochures. E tautua fo'i i le fa'aliliuga o gagana, ma le tapenaina o ni tusi e fia lomina i so'o se sionara o fatuga.




All our books are distributed by Academy Books Company, Auckland City. Contact: www.academybooks.co.nz & Wheelers Books NZ. Contact: www.whealersbooks.co.nz

Ask for our Latest publications

UILI FAU UPU

Saili tali o fesili o lo'o i lalo. Pule oe pe sipela i luma (clockwise) po'o tua (anticlockwise). E sa le feosoosofa'i.



1. Tusi mai ni soa se tolu o le upu *taimi* i le Igilisi:

2. Saili ni fausaga o le upu *ufi*.

3. Su'e le upu *taufi* ma tusi sona faamatalaga:

4. Tusi uma upu/ fuiupu e ta'i 4-8 mata'itusi, ma o latou soa i le Igilisi (English).

(E faitaulia ma upu ua ta'ua i le 1, 2 & 3)

Lelei atoa = 12 upu
Lelei tele = 8 upu
Lelei = 6 upu

SUDOKU #33 (TAALOGA I NUMERA)

				7		4	2	
3			4					
		8		3	2		9	
		7					4	8
6								1
5	3					6		
	5		9	2		1		
					4			7
	9	1		6				

Fa'atumu pusa numera (tama'i sikuea) i fuainumera 1 i le 9. Ia uma ane le galuega ua maua atulaina ta'itasi (tu, fa'alava) o iai le 1 i le 9. E tofu le atulaina ma lona fa'atulagaga e ese mai le isi.

FAIGOFIE/ FEOLOLOLO/ FAIGATA

TALI GALUEGA OLA 33

UILI FAU'UPU 33

1. *taimi*—time; *taimi*—to conduct song; *taimi*—season
2. *ufi* & *ona* fausaga: *ufiufi*, *ufia*, *ufitia*, *ufiga*, *faufiufi*, *ufiina*, *taufi*
3. *taufi* (veape). Faaoga ni lau mata e pei o laufa'l e ufi ai le umu, faapulou i tau fou ma le tauvela. *Taufi lelei le umu ne'i mata*. Soa Peretania: to cover

4. *fuataimi*—conductor; *fuata*—season; *fuata'i*—to begin; *fuata'i*—establish; *iata*—yard; *taufi*—to cover; *taimi*—time, hour

TALI SUDOKU #33

9	6	5	1	7	8	4	2	3
3	7	2	4	5	9	8	1	6
1	4	8	6	3	2	7	9	5
2	1	7	3	9	6	5	4	8
6	8	9	7	4	5	2	3	1
5	3	4	2	8	1	6	7	9
7	5	6	9	2	3	1	8	4
8	2	3	5	1	4	9	6	7
4	9	1	8	6	7	3	5	2

TA'U MAI

O le siamupini e lei faia'ina i ana fusuaga faapolofesa o le alii o Rocky Marciano. 49 fusuaga, 43 i le tuioti.



A	V	E	L	E	F	A	M	O	G	A
V	K	M	U	A	T	L	G			
A	G	A	G	A	T	A	U	T	O	G
A	A	A	S	A	H	S	I			
L	E	T	O	G	O	K	O	L	E	A
E	U	I	V	E	F	G	T			
O	N	A	S	I	I	F	A	N	E	
L	A	M	D	O	I	A				
E	E	M	A	L	O	A	A	T	O	A
I	T	M	T	T	A	L	I	G	A	S
L	E	A	P	A	I	T	A	L	I	G
U	U	O	T	G	T	G				
A	V	A	E	M	A	L	O	L	O	G

TALI PASO 33

© PasoSamoa, 2014

O LE PASO I GAGANA E LUA Malo \$20

Fa'atumu le paso i upu/igoa Samoa. Fill the crossword with Samoan words/names. There are exceptions.

1		2		3		4		5	6	7
							8			
9	10		11		12		13			
					14					
15		16		17			18			
							19			
	20				21			22		23
24				25			26			
27			28					29	30	31
		32						33		
34							35			
							36			
37					38					

E leai se isi na malo i le vaiaso talu ai.

Fa'alava~Across

1 Manu Samoa: Kahn Who? (8)



5 behave (4)

9 Find secret

place name (Samoa) (6)

13 town east coast Coromandel Peninsula NI (6)

14 canoe (2)

15 Wallabies: Matt Who (6)



18 9th day (3,3)

20 drunk (3)

21 pig pen (3)

22 lawsuit (4)

26 credit (2)

27 loud cry (2)

28 Secret word (Hawaiian) (5)

29 A Samoan village (4)

34 fetch water (3,3)

35 wild hunting (6)

37 watch (4)

38 Manu Samoa: Faalemiga Who? (8)



Lalo~Down

1 hot (food) (3)

2 keep (3)

3 turn (3)

4 him (2)

6 A winner

First name (7)

7 ocean (region) (7)

8 care (5)

10 bake (3)

11 Manu Samoa: Jack Who? (3)

12 scolding word

interj. (3)

15 stand (2)

16 sour (4)

17 to pass along (2)

19 secret word (money) (5)

22 javelin (3)

23 gums (3)

24 Manu Samoa: Faatiga Who? (6)

25 uproar (5)

30 dog (5)

31 give to someone next to you (5)

32 Kickboxing: Mark Who? (4)

33 core (fruit) (4)

36 grasshopper (2)



Ta'u Mai: le faamatalaga e le sa'o i faamatalaga uma nei e faatautu i le Taula Lona Lua a le Lalolagi. (a) O Hitila le ta'ita'i o Siamani (e) Sa auai le malo Rusia (i) O JF Kennedy sa peresetene i lea taimi.



POLE MA PAPA

